



REPUBLIKA E KOSOVËS - РЕПУБЛИКА КОСОВО - REPUBLIC OF KOSOVO

GJYKATA KUSHTETUESE

УСТАВНИ СУД

CONSTITUTIONAL COURT

KABINETI I KRYETARIT / URED PREDSEDNIKA / CABINET OF THE PRESIDENT

Prishtinë, më 24 shtator 2021
Nr. ref.:KK 231/21

Z. Aleksandër Lumezi

Kryeprokuror i Shtetit

Rr."Luan Haradinaj", Nr.100

10000, Prishtinë, Republika e Kosovës

Lënda: Informim për Mospërmbarim të Aktgjykimit në rastin KI56/09, të Gjykatës Kushtetuese të Republikës së Kosovës, parashtrues: *Fadil Hoxha dhe 59 të tjerë*, të 22 shtatorit 2010; dhe Aktgjykimit në rastin KI132/15, të Gjykatës Kushtetuese të Republikës së Kosovës, parashtrues: *Manastiri i Deçanit*, të 19 majit 2015

I nderuari Kryeprokuror i Shtetit, z. Lumezi,

Gjykata Kushtetuese e Republikës së Kosovës sipas nenit 112 [Parimet e Përgjithshme] të Kushtetutës së Republikës së Kosovës është autoriteti përfundimtar në Republikën e Kosovës për interpretimin e Kushtetutës dhe të përputhshmërisë së ligjeve me Kushtetutën.

Bazuar në paragrafin 1 të nenit 116 [Efekti Juridik i Vendimeve] të Kushtetutës, vendimet e saj janë të detyrueshme për gjyqësorin dhe të gjithë personat dhe institucionet e Republikës së Kosovës. Në ndërlidhje me këtë dispozitë kushtetuese, rregulli 66 (Zbatimi i vendimeve) i Rregullores së Punës nr.01/2018 të Gjykatës Kushtetuese të Republikës së Kosovës gjithashtu përcakton që (i) të gjitha organet kushtetuese, përfshirë gjykatat e autoritetet tjera, janë të obliguara të respektojnë, të jenë në përputhje dhe të zbatojnë vendimet e Gjykatës, brenda kompetencave të tyre të përcaktuara me Kushtetutë dhe me ligj; dhe (ii) të gjithë personat fizikë dhe juridikë janë të obliguar të respektojnë vendimet e Gjykatës dhe t'u përmbahen atyre.

Për më tepër, bazuar në paragrafin 6 dhe 7 të rregullit 66 të Rregullores së punës: (i) në rast të moszbatimit të një vendimi ose të vonesës në dhënien e informacioneve për Gjykatën për masat e ndërmarra, Gjykata mund të lëshojë një Aktvendim në të cilin do të theksohet që vendimi nuk është zbatuar dhe të publikojë këtë qëndrim në Gazetë Zyrtare; dhe (ii) të informojë Prokurorin e Shtetit për të gjitha vendimet e Gjykatës që nuk janë zbatuar.

Sipas autorizimeve të lartcekura, përmes shkresave gjatë viteve 2014, 2015 dhe 2019, Kryeprokurori i Shtetit është njoftuar për moszbatimin e Aktgjykimeve të Gjykatës: (i) KI08/09, parashtrues *Sindikata e Pavarur e Punonjësve të Fabrikës së Çelikut, IMK*, në Ferizaj, Aktgjykim i 17 dhjetorit 2010; (ii) KI112/12, parashtrues *Adem*

Meta, Aktgjykim i 5 korrikut 2013; dhe (iii) KI187/13, parashtruese N. Jovanović, Aktgjykim i 1 prillit 2014.

Bazuar në autorizimet e lartcekura të përcaktuara në Kushtetutë dhe Rregulloren e saj të punës, Gjykata ka bërë rivlerësimin e zbatimit të Aktgjykimeve të saj, dhe pas analizës të shkresave përkatëse, gjithashtu ka konstatuar edhe mungesën e zbatimit të dy Aktgjykimeve tjera, dhe përkitazi me të cilat, për pasojë ka nxjerrë Aktvendime për Mospërmbarrim dhe për të cilat Ju njoftojë përmes kësaj shkrese.

Më saktësisht, më 22 shtator 2021, Gjykata ka nxjerrë Aktvendime për Mospërmbarrim lidhur me dy Aktgjykime të Gjykatës Kushtetuese, përkatësisht, (i) Aktgjykimin KI56/09, parashtrues: *Fadil Hoxha dhe 59 të tjerë*, të 22 shtatorit 2010; dhe (ii) KI132/15, parashtrues: *Manastiri i Deçanit*, të 19 majit 2015.

Përmes këtyre dy Aktvendimeve për Mospërmbarrim, Gjykata ka vendosur (i) të konstatojë se Aktgjykimet në rastet KI56/09 dhe KI132/15, nuk janë zbatuar nga autoritetet përgjegjëse të Republikës së Kosovës; (ii) të publikojë Aktvendimet për Mospërmbarrim përkitazi me Aktgjykimet në rastet KI56/09 dhe KI132/15; si dhe (iii) ta njoftojë Prokurorin e Shtetit për nxjerrjen e Aktvendimeve për Mospërmbarrim lidhur me Aktgjykimet në rastet KI56/09 dhe KI132/15.

Në fund, dëshirojë të theksojë se përtej konstatimit të mospërmbarrimit të Aktgjykimeve të lartcekura në kundërshtim me nenin 116 të Kushtetutës dhe këtij njoftimi për Prokurorinë e Shtetit, Gjykata Kushtetuese nuk ka kompetencë për vlerësimin e përgjegjësisë për moszbatimin e Aktgjykimeve të lartcekura nga autoriteteve përgjegjëse. I takon Prokurorisë së Shtetit që të ndërmer veprimet e mëtejme sipas autorizimeve ligjore, bazuar në Kodin Penal dhe atë të Procedurës Penale të Republikës së Kosovës.

Gjykata Kushtetuese e Republikës së Kosovës mbetet e përkushtuar në realizimin e plotë të funksionit të saj si gardian i Kushtetutës dhe mbrojtjes së të drejtave të njeriut të përcaktuara në Kushtetutë. Për realizimin e këtyre qëllimeve, kjo e fundit mirëpret bashkëpunimin me Ju, gjithmonë në interes të respektimit të kushtetutshmërisë dhe të parimeve të sundimit të ligjit në Republikën e Kosovës.

Me respekt,
Gresa Caka-Nimani
Gresa Caka-Nimani
Kryetare



Bashkangjitur:

1. Kopja e Aktvendimit për Mospërmbarrim të Aktgjykimit KI56/09, të Gjykatës Kushtetuese të Republikës së Kosovës, të 22 shtatorit 2021; dhe
2. Kopja e Aktvendim për Mospërmbarrim të Aktgjykimit KI132/15, të Gjykatës Kushtetuese të Republikës së Kosovës, të 22 shtatorit 2021.